


**DWIGHT DAVID EISENHOWER
JANGGI TANGANIKO KANDIKE
SEGIMIN.**



REV. KARBENSON SANGMA.



Janapchengani.

*Dalgipa mingsinggipa ong'na siggipa manderang,
mingsinggipa manderangni gimin poraina aro
skie rana namnika. Foot ball kalna
changna siggiparang changgiparangni
gimin u'ie ra'a.*

*Ia agilsako na'a mingsinggipa namgipa dilgipa
ong'na sikode ia Dwight David Eisenhoweri
Janggi tanganiko chugimik sena manja-
haoba nangbatgiparongkode seaha.
Na'a Janggi tangao chusokgipa
ong'na sikode iano nangna
dakchakani ong'naba
gnang.*

*Saoba ia kitapko namdapatna kupatianirangko
onpaode anga milelbegen.*



Japang Katarang.

Sl. No.		Jak.
1.	Poraiani Bak 1. Bisamiting Salrang.	1
2.	Poraiani Bak 2. Schoolo Poraiani gimin.	3
3.	Poraiani Bak 3. Sipai kamna poraiani.	4
4.	Poraiani Bak 4. Europe dakgrikani gimin.	6
5.	Poraiani Bak 5. D. Day, Europeko ra'na tik ka'ani gimin.	9
6.	Poraiani Bak 6. Utaha Sagal rikamko ra'ani.	10
7.	Poraiani Bak 7. Sasonni bidingo kam ka'ani aro Janggi tangani.	13
8.	Poraiani Bak 8. Dwight David Eisen- howerko bonchote salam ka'rikani.	17
9.	Poraiani Bak 9. Bonkame grongrikani gilja (Farewel Service)	20
10.	Poraiani Bak 10. Abilene Kansaona Ra'angani.	22

Printed at the Don Bosco Press, Tura.



Dwight David Eisenhoweri janggi Tanganiko Kandike Seani.

"Anga America a'songni bijatchio atchiaha".

Poraiani Bak I

Bi'samitingni Salrang:

Dwight David Eisenhower man'e chagipa aro chugipa ma'chongoni ongpaja, indiba toromigipa nokdangoni onga. Dwight David Eisenhoweri pagipa David Eisenhower aro uni ma'gipa Ida ong'achim. David Eisenhower mechanics kamko ka'gipa ong'e dingtang dingtang biaprangona reroroe kamrangko ka'na nanga-chim. 1880 bilsio ua Texasni songjinmao rail garini engineerango kam ka'engmitingo David Eisenhower 1890 bilsini October 14 tariko, uamangni para ra'e donggipa noko atchiaha. Ua bisantal been ansenge dalrorigipa ong'aha.

Dao noksano pagipaba David depanteba David ongani gimin jamano ma'gipa una Dwight David Eisenhower ine uko mingdapaha. Dwight Eisenhoweri atchiani bilsisani jamano, uni pagipa David Eisenhower Kansan songjinmaona re'ange kamko ka'eaha. Iano kam ka'engmitingo Kristian dolsako grongaha. Ua-

mangara River Brethren minggipa ongachim. Uamang an'tangtango Kristoo Jongadarang ine mingachim aro pilak kamo aro olakkiao uamang jongada gitan dakachim. David Eisenhower aro uni nokgimik ia dolo nape toromna gisik nangbatbaaha. Uamang nokgimik toromni gimin gisik nangbae dedrangkoba toromo dalatna ma'gipa gisik nangbaaha.

David Eisenhowero depante sakdok gnangchim. Uamango saksaba demechik dongpajaha. Uni gimin iamang sakdok depanterangan magipako dakchakna nangaha. Nokni pilak kamrangko iamang saksak saggipinna nisigrikgija katokaiaha. Songaritaoni, nok jam tarla aro ba'ra kancha suaona kingking iamang kam ka'na nangaha. Pilakan kamna gisik nanggiparang ongachim.

David aro Ida antangmangni dedrang sakdokkon toromo dalatna joton ka'aha. Noko toromko skina aro namao sason ka'na gualjaha. Uamangni bimchipe kam ka'ani biteko pagipa ma'gipa nikange kusi ongaha. Uamangni pilak Janggi tanganio pagipa ma'gipani skia gita choligiparang ong'aha ine nikgen. Roy, uamangni dejakra samni gimin Doctor ong'e manderangna dakchakna man'aha. Arthur, badingchiwalani gimin poraienba Bauk Manager ong'aha. Earl, Engineeringo poraie, Enggineer ong'aha, Edgar, niamni gimin poraie Ukkir ongaha. Milton Educationni gimin poraie, Universityni Vice Chancellor ongaha. Dwight Eisenhower sasenni gimin poraie sipaini dalgipa

aro Amerikani President ong'aha. Indake an'ching Dwight David Eisenhoweri nokdango Janggi tanganiko kandike uina mangan.

Poraiani Bak 2

Schoolo Poraiani gimin :

Nokdango obosta namjani gimin name suk ong'e gipinrang gita poraina manpajaha. Dwight Eisenhower bisantal Sunday Schoolna gisik nanggipa ong'aha. Ua Schoolo poraiao namgipa aro gisik nanggipa ong'achim. Ua Arithmetic, Alzabra aro Geometryko namnikgipa ong'achim. High Schoolo poraimitingo ua history aro Geometryko namnikbataha. Dilgipa, ka'donggipa aro amrikkitegipa manderangni gimin ua poraina namnikbataha. Jensalo ua High Schoolko matchotaha, jojol Collegeo poraina manjaha. Ua antang Edgarko porai-atenba antang kam ka'e dakchakna tik ka'aha, maikai Edgar jamano uko dakchakskana man'gen. Bilsisana kingking Dwight kam ka'beaha. Adita jarangna walprako ghotna 12 dake kam ka'aha. Antiprako walsnina kingking kam ka'aha. Indiba gitik gitak una rosong kopal namaha. Saliramehipak indin poraina cholko onenga ine uni ripengrangoni saksa aganeaha. Ua joljol Senator Joseph L. Brislowna dolgato seataha. Adita antirangni jamana porika ra'ani onngen ine uiatako mansoaha. Uiata gita Dwight Eisenhower adita antini jamano porika

seaha. Ua Anapolisona seanio skanggipa onga-aha aro uan Navyni kamna onga-chim. Saliramni porikako seanio ua gnigipasan ongaiaha. Navyni kamo napna gita ua bilsio 20 batahani gimin ua napna manjaha.

Poraiani Bak 3

Sipai Kamna Poraiani :

Jensalo Dwight Eisenhower Sipaini kamna seokako manaha aro poraina abachengaha, uko bangan Ike ine sengsote mingbataha. Ua gisik nangbee poraiaha aro johan salo kalgrikna aro pokar kalaniko kalna namnikaha. Ua skotango tupiko name donna manningjaha, uni gimin adita mandapanirangko gimatbeaha. 1915 bilsio Saliram sipai dolni dilgipa onga sak 59 General Rankona seokako manaha. Ikeba ua dolona donatako manpaaha. Iamangoni sakgnide Star Rongbongako manjolaiaha. Uamangara Ike aro Bradley ongachim. Pilak porika ra'gipa 164 oni Ike 61 gipa gadangona donatako manaha.

Sipaini kamo ka'roroani :

1915 bilsio ua Fort Tom Houstono guigipa Leutennt on'e ka'engmitingo Danveroni saksametra uko grongna reangaha. Uamang sakgnian namnikgrike ua apsan bilsini July jao uamang bia ka'aha. Bilsisani jamano Americaba skanggipa Dal'gipa dakgrikanio jak on'paaha, Dakgrik-

ako aganpraka bak jamanan Eisenhower Captain rankona doatako man'aha aro sipairangko train ka'na watataha. Ua Gethy Sburg minggipa biapo sak 600 sipairangko dilgipa ong'na skiaha aro sak 9,000 ni dilgipa ong'aha.

1922 — 1924 bilsirangona Ike Panamao kam ka'aha. 1926 bilsio Kansasni Leavenworth minggipa biaponi sipairangko dilgipa ong'na porika raon ua pass ong'aha. Iani jamano Ike France asonggimikna reroroe nina manaha aro skanggipa Dal'gipa dakgrikani biaprangko nina chol ong'aha. 1933 bilsio General Douglas Mac Arthurni ningo dakchakgipa ong'na donatako man'aha. 1935 bilsio General Mac Arthur Philippin asongo comon wealthni sipairangko kupatitimgipa ong'na donatako man'haon, Ikeba uko jarikangpaaha. Philippin asongni Manilao warachakna gita tarisoanirangko uaba daktimpaa-ha. Ia somoio Ike bilsio 40 onghaoba Airoplane chalaina skiaha aro Licenseko man'e, ghonta 350 na kingking bile ropaaaha.

Adita somoirangni jamano Ike aro Mac Arthur meligrikjae dingtang dingtang onggrikaha. Jensalo gnigipa Dal'gipa dakgrikani ong'aha dakgrikao dilgipa General George C. Marshall dilgiparangko sandiengachim, ua Ikeko nikchang-jaha. America jensalo ia dakgrikao jak onpaaha, dilgiparangko seokna nangaha. Uano seokgimin-rangara Omar Bradley, Courtney Hodges, George Patton aro Mar Clark ong'achim.

Japanesrang Pear Harbourko bom galahaon, Marshall, Eisenhowerko Head quarterona chongmotan Washingtonona okamataha. Ua somoio Pacific sagalo Americani sipairang maiko dakgen jajaengachim. Anching maiko dakgen? ine Marshall Eisenhowero singaha. Americani sipairangko bangbatatna aro warachakna nanga ine ua aganchakaha.

1942 bilsio Marshall Ikeko Major Generalona donataha. Eisenhower na sipaini manderaaniko onmano Europeni ajao dakgrikani ajao dilgipa ongchina uko kamo donataha. Ia somoi Europeo dakgrika uamangna namen namjaengachim.

Poraiani Bak 4

Europeo Dakgrikani :

1942 bilsini dingkarini somoio Europeo dakgrikdilaniko Eisenhower jako ra'aha. Ua somoirango pilakchin dakgrikani namjaengachim. Americani sipairang baksa dakgrikchapenggipa English sipairangko pilakchin aro pilak biapon sikchepeangachim, Germani sipairang pilak biaprangon nambatgiparang ongengachim.

Jensalo German sipairang Kassareani apgitok gita changsote Americani aro English sipairangko bakgni ongatna joton ka'engachim; Eisenhoweri sipairang uamangko ohampcngna man'aha.

Iani jamano Africao donggipa, Europe donggipa sipairang gimikkon Eisenhoweri dilanio done dakgrikna abachengaha. Ia somoirango salo ghonta 18 na kingking kam kana nangaha. Ia salrango uni officeo tomani tablerango salprako chang 6,000 na bate telephone aganna nangaha.

1942 bilsini November jao Africaona, Airoplane, dakgrikani jahasrang aro dakgrikgipa sipairang sokna nanga ine tik ka'dilaha. November 8 tarikni pringo Eisenhoweri sipairang Algeriani ajaona sokena manaha, aro mamungba nengani dongjachim. Unon Eisenhower antangni Officeko Algeriaona jitangaha. Ia salrango Eisenhower Washingtoni kobolrangko joljol mansorongaha. Ia somoirango dakgrikgipa Airoplanerang bangjani gimin adita neng-anirang ongaha. Indiba Eisenhower je donga uarangko name tariaha aro name jakalaha. Indake ua 1943 bilsini May jao Africako am'e German aro Italyni sipai sak 275,000 ko rim-gope patoko donaha.

Africako amani jamano Britishni Prime Minister Winston Churchill Sicillko amna gita nangdapa sipairangko ondapna kurachakaha. July 8 tariko Eisenhower Maltaona bilangaha aro uano walgimik aningo donge chanchidilaha. German sipairang warachakna namen tarisoahaoba Eisenhoweri sipairangko amchaksojaha, Sicillyko amsrangaha aro Italyni jatohiona sokangaha. Ia amani jaman President Franklin D. Roosevelt aro Prime Minister Churchill

dakgrikani abaona reange nieaha. Iani jamano Roosevelt Eisenhowerko American sipairangko dilgiparangni kosako dalbatgipa ong'na uko donataha. Ia somoirango Eisenhower Englandoni, Americaoni telegram aro telephono agangrikan matchotjaha aro bangbate amroraangaha.

Jensalo Eisenhower Europeo raggipa killarangko ra'na miksongaha, Britishni Field Marshall Sir Alan Brooke aro Field Marshall Sir Bernard Montgomery Eisenhowerko agao dakgrikdihnade choliya ine matnangdilna abachengaha. Indiba Lt. General George Patton, Eisenhower nambatgipa dilgipa ine aganchakskaha. Indake adita jegrikani ong'aha. Montgomeryko katinggipa sapau ine donaha. Indake dilgiparangni gisepo adita kajia golmal ongahani gimin Montgomeryni ningo donggipa General Bradley kamko wate katna am'aha. Indiba Eisenhower gisik gnangbee namatna kam ka'aha aro tomtome namatna manaha. Jensalo dakgrika matchotaha Sir Bernard Montgomery iana Eisenhowerko mitelaha.



Poraiani bak 5.

D.Day- Europeko rana tik ka'ani

May jao Europeko ra'gen ine chanchiengon, ua bangbata Airopiane aro dakgrikani Jahas-rangko nanggen ine ua nikaha, maikai Salo Amerikani sipairang aro Airopianerang aro Britishni plainerang bom galna man'gen namen hisap ka'beaha. Germanrang Normandy aro Varrelleni Sagal rikamo rakbegipa warachakaniko tarisoaha. Ia somoi Prime Minister Winston Churchill tarigimin pilak ostrorangko aro manderangko niaha aro Eisenhowerko gronge aganaha, "Agilsakni Rasongde nangni Jakonjok."

"Omaha sagal rikam mingsinggipa History" Omaha Sagal rikamo American sipairangni skanggipa bobilko chadrape dakgrikanio, Sagalni chipakkorerang baksa American sipairang bangen siahani gimin anchiari nikpilaiaha. Ua pringo guuri dinan baksa silai aro gaman goani kurang jrip jrip ongenggipa Sagalko golmal ka'aha aro chipakkorerang daldale tangbaaha.

16 gipa Americani jaachi ree dakgrikgipa dolko dorengni dohisako chagopa gita pilak Germani tarigimin warachakani golrang baksa dongsoengako chagopaha. Ia Omaha saga rikamko chadrae dakgrikanio Americani depanti saksa 2.590 ko gimaatna nangaha. Sak 31,000 sipairang agaona sokangaha.

Chanchie kam ka'ani. (Day of Dicision)
 June 4 tariko ia salona kingking gisik ra'ani
 ongenga. Ian Gold Beach minggipa Sagal
 rikkamko ra'ani ong'achim. Iako ra'na gita
 Eisenhower salo dongnapgija, walo tusinapgija
 kam ka'aha. Ua sagalo dakgrikgipa Navy dolko
 aro sako bilgiparango name tariaha. Somo
 aro salkosan nitimgiparango kobolko rasimsim-
 aiaha. Ua Jahas bol 5,000 aro sako bile
 dakgrikgipa Airoplane bol 11,000 aro jaachi ree
 dakgrikgipa sak 1,000,000 ko tarie donaha.
 (Meteologists) somoiko agantimgiparangni agan-
 akosan nisengsoe dongsoaiaha, June 6 tariko ua
 gipin dilgiparango okamchimonge agangrikaha
 aro sengchaode sipairango ka'donga gri ong-
 atgen, ine kenchakaha. Somoiko nisenggija
 wataoba bangen gimaani ineba kenchakaha.
 Minute bonga jrip jrip donge uni jaktikra
 dilgipa Lt. General Water Bedell Smithna agan-
 aha, "Atcha Smith, anching re'gnok"

poraiani bak 6.

Utah Sagal Rikamko Ra'ani.

Salgipinni pring andalsikengmitingon 101
 gipa sipaini dol Airoplanerangchi dakgrikgipa
 dol pilak dakgrikani tarianirango ra'bite sengeng-
 gipa sipatrangna Eisenhower agane inaha, "Ia
 pilakkon chinga nasimangna simsakgen. Ua salni
 walo Eisenhower waljatchina kingking Airoplane-
 rangni bildongengako aro dakgrikani jahasrangni
 choangenganiko nirikaha.

Dakgrikkatchengani antisani jamano Eisenhower dakgrikani abaona reangaha aro million bri sipairangna kadongatani katarangko aganaha. July 25 tariko Germani rakbee warachakna tarigimin Normandyoniko pe'aha ine knaon Ike dilgiparangko grongna reangaha. Lt. General George S. Patton, Lt. General Bradley aro Courtney H. Huges uko ka'srokbee grongsoaha. Canadani sipai dolba sagal rikamona sokangaha. Utah sagalni rikamko U. S. A. ni airoplanerangchi dakgrikgipa dol amaha aro agaona reangna man'aha.

Omaha sagal rikamo banga sipairang siaha, maina Germanrang uano dalgipa gamanrangko donsoaha. 116 gipa sipaini dol bangen siaha. Sipairangoni saksaba bobilko changsamangmangba aoskana mansrapjaha. Mail bonga sagal rikamjoljol manggisian danaiaha. Sak 12,000 sipairangni anchi chipakkorerang baksa sagal dramrangona banpakbaaha. Pringona kingkingde Germani dilgiparang bobilrangko rikgalsona mana ine kusi ong'aha.

Eisenhower iani gimin name sandie niaha, aro skatangtang dakani asel ine nikaha. Kasne kasne sipairang agaona sokangaha aro dolantini dilgiparang chanchigrime cholrangko sandigrikaha. Julyni bonachibara Americani sipai dolsa Saint Lo minggipa biapo Germani tarigimin pilak ostorangko kningataha. Sagal rikamona Sherman Tangkarangko donna man'aha. Major General George S. Pattonni gitamgipa dolni sipairang Franceko batsotangaha. Indake amroro.

Angengon, Eisenhower antangni Officeko Jullouville minggipa biapona chongipa songjinmaona jitangaha. Ia biapo dongmitingo saksa sipai Eisenhowera matchu bima mangsako boksia ra'baaha maikai ua dut sepe cha'na mangan. Indiba grongna pa'jae chelao dongale reangaha. Dilgiparangni gisepo iani gimin adita kajia ong'aha, indiba Eisenhower antangan dutko sepe mesokaha.

Dingkari abachengachipak Eisenhower Versailles minggipa biapo gital atipko dakaha. Ua apsan bilsini December jao Germani sipairang Arennes abri gita bolgrim aro suuriko rebae chadrape dakgrikna abachengaha. Indiba Eisenhower iako uie General Montgomeryko salgrochipak napbachina geetaha. Aro Major General Pattonni sipairang Salgipengchi napbae Bastogne minggipa biapko chadrape ra'aha. Indiba Panzarni sipairang Pheneni janggilchi bitdinpilna nangaha aro sak 90,000 sipairangoni mitam siaha aro mitam mata buako man'beaha; aro Tank bol 500 ko nosto ka'aha. Bulge minggipa biapo dakgrikanian German sipairangni bonchote warachakani ong'aha.

Iani ja'mano Nazini sipairangko pilak biapon amroroangaha. April jao pilak dolni sipairangan Elbe Chibimani rikamona sokchimongtokaha. Pilak dolni sipaini dilgiparang aro Prime Minister Winston Churchill Berlinko ra'china geetaha. Indiba Yaltao Russianrang baksa kurachakgimin gita Berlinona reangjana Eisenhower tik ka'aha. Berlinko ra'ani nangbea

ongjaha ine ua sipaini dilgiparangna agane Salaramchini rikdobaenggipa Russiani sipairangko sengsona tik ka'aha. 1945 bilsini April 25 tariko Saliramchini dakgrikbaenggipa aro Russiani sipairang grongrikaha aro German asongko bakgni dake sualaha.

1945 bilsini May 7 tariko Hitlerni sia bak ja'manon Germanni sipairangni dilgiparang Eisenhoweri Head quarterona Reims minggipa biapona re bae an'tangtango bamataha. Eisenhower aro gipin dilgiparang cable watate aganataha, "Apsan krime dakgrikani 1945 bilsini May 7 tarikni 2: 41 A.M. bajio chusokaha." Pilak asongrangan ia cheanina kusi ong'aha aro katohae inchroaha. Sigiparangna bangan kalimaha, tanggiparang pilakan rasongko man'aha. Indake Eisenhower an'tangni sipairangko dilanio name chusokgipa ong'aha.

Poraiani Bak 7.

Sasonni Bidingo kam ka'ani aro Janggi tangani.

Dakgrikao amgipa chegipa onganina mandarang uko mande ra'aha aro rasongko on'aha. Eisenhowerko American sipairangni dalbatgipa ong'na donataha. Ua Marshallko jachongrikaha. Indiba ua ia kamo ruute dongjaha. 1948 bilsion ua sipaini kamko wate New York Songjinmani Columbia Universityni President ong'na reangaha.

Bilsigni jamano President Henry Trueman aro uni gitcliam sipaini dilgiparang molmolahani gimin North Atlantic Treaty Organization minggipa sipairangni dolko dilna Europeona reangpilaha. Uano dongmotingo ua kamtango name aro chusoke dakaha. Uni pilak kam-rango manderang uko namniike demitelaha. Ua pilak baksan nangringipa aro ripeng onggipa ong'achim

1952 bilsio Amerikani President election ongahaon banga manderang uko President ongatna namnikaha. Jensalo uko Presidentna chakatchina seokaha, ua pilak jatrangni Communist baksa Koreao dakgrikaniko bonatna kurachakaha. Indake ua 1952 bilsio America asongni President ong'e dilchina seokako man'aha.

President songako manahaon, Eisenhower dakgrikani biap ba ajarangona antangan reange nieaha, aro uni President ong'e chalaina abachengachibaran tomtom onggijagipa Asiao tomtomani rebaaha. Europeo cieani bak jamanan ua jatrangni apsan ong'e kam ka'aniko aganprakataha aro ua gitan President songako manahaon ua iako aganaha," An'chinga Bilakgipa ine antangtango mesokna nanga, Bilgriode bakrime kam ka'pana manjaha. Bilakgiparangsak bakrime kam ka'na man'ala; An'ching Bilakgipa ongen ine anga bebe ra'a, indiba chakchikgipa ong'na nanga. Anching antangtangni gamko warachakna tarigipa ong'na nanga, indiba gipinrangni gam aro man'gnikoba chanchininggipa ong'na nanga".

Eisenhower antangni President ong'e White Houseo bilsa chetna dongmitingo mongsongbatgipa aro gisik ra'na nanggiparangko ua donangaha :—

1. Ua Federal Budgetko apsan dake tik ka'chengna man'aha.
2. Ua Civil Right Lawko pass ka'ataha aro bilsa 89 ongosi iako dakna man'aha.
3. Asonggimikni pilak rokomni kam ka'giparangna dolmahuko bariataha, mongsongbate sipairangna.
4. Kam ka'giparangko dakchakna gita ua hajalni hajal dolmaha komie cha'giparangna Social Securityko dakatchengaha.
5. Inter-State Free Way Systemko America State gimikona ua dakatchengaha.
6. Alaska aro Hawaiiko State ongataha.
7. St. Lawrence Sagalni ramako dakangaha.
8. Ua Koreao dakgrikako bonataha aro Americani sipai saksaba uano sijaha.
9. Iran, Gualamala, Lebanon, Fromosa, South Vietnamona Communist dolni gip-oroobaaniko champengsona tik ka'aha.
10. Bangbangona sandie nianiko abachengataha.
11. Messile watani golko tarua abachengataha.
12. Americani sipairangko nambate rakkina cholrangko dake donangaha.
13. Governmento kam ka'e budepa buchma ongiparangna indin sana-bananiko tik ka'angaha.

14. Ansengbaljokani, Leka porani aro gipin namgiparangna niamo bakko ua donda-pangaha.
15. Ua asonggipinrangona nama kumonganina aro ripeng onganina reroroe grongaha. Europe, Asia, Africa, South America aro Pacific chichangrangona reangaha. 1959 bilsio ua Delhiona re'baaha aro Prime Minister Nehru una L L.D degreeko Delhi Universitychi on'aha. Million 9 mande rang uko mande ra'aha.

Eisenhower termn gni President ong'aha aro uni Officeko chalaimitingo banga matnangako manoba, uni donga dipet asongna jatna tomtomaniko ra'baaha, aro chaa ringani bidingo nambatatna ua somoiko darangni chasongoba ba somoio apsan ongatna mankujaenga.

Jensalo uni gnigipa term bonaha, President Eisenhower, sipaina tarigimin ong'e pangnan tomtomaniko amaha. Uni gimin ua iako antangni asongna aro jatna bonkame aganangaha, "Nangnikgijagipa obostarangko ongatanina sipairangko tarie donbo, Ia anchingni sason Democraticna aro jakgitelanina mamungchiba gimataniko ra'banabe. Communist dolni giprorobaanina gisik raksochina ua aganaha. Ian agilsako Isol gri Janggi tanggipa, ka'saningjagipa, Agilsaknirangna miksongaigipa ong'aia. Iako dakgrikso a dikdiksa krengsoanisan ong'jawa indiba pangnan jakgitelko mikkangtango done krengna nanggen.

1961 bilsini January jao bilsu sotbongamangna a'songtangna aro jatangna nambee kam ka'ani jamano pilak antangni dakgnirangko sakgipinna pakwatangaha. John F. Kennedy uni jamano President ong'rikaha, aro una jatko dilaniko donangaha.

Bilsu 70 bilakgipa, chegipa aro aganna changgipa, pilak kamrangko matchotmano ua sipairangni jatchiko mortoro reangaha. Ian uni Janggi tangao sipairangchi salam ka'ako man'e rechotani ong'aha. Iani jamano darangba uni gariko nirikjaha. Dao Dwight David Eisenhowera begulko sikjajok. Ua sikdidkgipa antangni abona, chongmotin Abileneona reangpilaha.

Poraiani Bak 8.

**Dwight David Eisenhowerko Bonchote
Salam Karikani**

March 30, 1969 ; 12: 25 P. M.

Washington songjinmao sipairangko sanram hospitalo, 34th gipa Americani President, gni-gipa Agilsakni Dalgipa dakgrikao amdilgipa, Dwight David W Eisenhower, Palm Sunday March 30th, 1959 tarikni 12: 25 P. M. bajio duk gri, tomtome, jringjrotna nengtakna antangni ka'sara jikgipako, dedrangko aro madrangko wate reangaha. Americani White Houseo aro

pilak Stateni nokrango Americani flagrangko adhasan songdoaiha. Pilak biapon Television niksona aro Radiorango knasona man'aha. Agilsakni asong dam 89 ni jatrangni dilgiparang uko gronggrikna Washingtonona reangtokaha.

England asongni saksa Field Marshall jean Europeo dakgrikanio Eisenhoweri ningo kam ka'aha, dao bilsa 81 onghaoba, Viscont Montgomory uko gronggrikna re'baha. Batanggimin somoirangko gisik ra'e ua aganaha "Ua nangbaksa kadingsmitaigenchim aro una na'a mamungkoba dakgijan ongjawachim." Uko bonchote salam ka'rikna gita agilsakni pilak biaprangon asongtangtangni flagrangko adha sondoaha. Pilak agilsakni songbatrango uni siako see uiataha aro uko mande ra'kuna gita pilak Office, School aro Collegerangko aro dokanrangko chiptokaha. President Nixon bilsichetna Eisenhoweri Vice Presinent onggiipa dao indine aganprakataha, "Anga agilsakni ripengrangko ia chingni duk ongao ongrimpachina aro antangtangko onkanchina okamenga."

Washington songjinmani gilja noko uko gisik raani giljako ka'na kasinjri'anjrim Bellko salaha, aro Eisenhoweri manggisiko tarigimin Bakosto done ra'napbaaha. Iani jamano uko White Houseni Hallona ra'ange donkuaha. America asongmang mango sak 75,000,000 manderang Televisiono nirikaha.

Americao jatni dilgiparangoni President John F. Kennedy, Uni jonggiipa Robert F Kennedy,

Nobil Prize man'gipa Martin Luther King, iamang pilakan gulichi goe sootako man'aha. Indiba Eisenhower tomtome siangaha.

Americao pilak sipaini dolrang uamangni dakronga gita una mande ra'aniko dakaha. Eisenhowerni manggisiko salgipa garinini jaman jaman uni jikgipa ano uni depanteko jarikaha, President Nixon aro uni madrang jamano aro uamangni jamano asongni dilgiparangko reataha. Iamangni jamano Eisenhowerni madrangrang, aro jamano jatni mingsinggipa dilgiparangko reataha. Asonggipinani reanggipa dilgiparangko ruute sason ka'ani kri redilataha. Iaranni Raja Shah, 1941 bilsi intal sason ka'gipa ongani gimin gipinoni rebagiparangko van redilaha.

Americani Air Force 21 gipa dol kosak-joljol bile apsan duk onganiko mesokaha; aro Eisenhowerni copinko salgipa gureni jaku gama'a gita kasne bildilaha. Ramajoljol pilak rokomo Janggi tanggipa-School aro College chatro-chatrirang ramao line ka'e sengsoaha. American sipaio kam ka'e retired ka'giminrang, Negro manderang, kni roe donggipa happieni dolrangba sin'a chake ramao sengsotokaha. "Salam chinggni Dilgipa." ingipa gitko Americani sipaini Band sikaha. Pilakon duknirara gita nikpilaiaha.

Poraiani Bak 9.

*("Farawel Service) Bonkame Gronggrikani
Gilja :*

Washington Cathedral:

Sakchet manderang Eisenhower i Copinko Cathedralona ra'naphahaon, President Nixon ia katarangko agenchengaha. "Daulo an'ching duk onge tombaaha, indiba mande ra'naba reba'aha. Dwight David Eisenhowerko mande ra'an baksa uni dalako aro mingsingako mesokjolenga." President Nixon, General Eisenhower ni 1945 bilsio London. Songjinmao agangipa kattako aganskaha. "Anga America bijatchioni rebaaha." Beben ua America bijatchioni rebaaha. Ian geography gitasan orgaija, indiba gisikni biding gitaba ong'a. Ua banga pagiparangna aganmesckaha." Banga pagipa magiparang detangtangko bilakgipa, kadonggipa, ka'sachakgipa, aro ka'sachakninggipa ong'atna sikachim. "Mandeko uni dalgimin kamrangna pangnan mingsinga, uni mane chaanina ongja. Iachi ua antangni manderangko uo ka'dongatna bebe ra'atna ka'saatna aro agilsakna antangko mesokna manaha

Ua Americao dalgipa ong'aha aro uni pilak miksonganian namako dakna aro kakketo janggi tangna ong'achim. Ua asongtangna kasagipa

Jakgitelko aro jinmachi sason ka'aniko (Democratic) aganaigipa ong'jaha indiba uo dongkamgipa aro jakbitgipa ong'achim. Mrs. Eisenhower uni siani salo agangipako iano agantaina onpagen ine anga bebe ra'a, Ua aganaha, "Anga pangnan angni dedrangna ka'saa, anga pangnan angni sudrangna ka'saa, anga pangnan asongtangna ka'saa, uan Dwight David Eisenhower ong'achim."

Atamchibara Franceni President Charles De Gaulle sokbaaha. Ua France asongni General de Brigade Uniformko gane re'baaha. Ua Europeo dakgrikmitingo Star ronggniko man'gipa ong'achim, aro Eisenhoweri amanio uaba apsan bakko ra'e uni dilanio dakgrikpaaha. Ua dao budepa onghaoba sipaini bewalo copinni sambao-na re'bae salam ka'aha aro dikdiksana mande ra'aniko dakenba salam katiae reangaha.

Iani jamano Cathedrelara gipin asongni reanggipa mingsinggipa manderangni dilgiparangni parade ground gita ong'pilaha. Pilakan asongtangni watatko man'e made ra'aniko mesoktokaha.

Ia gilgjako Eisenhoweri ripengtang Reverend Dr. Edward L. R. Elson chalaiaha. Ua sak 3,300 manderangko Isolo bianiko dilaha. "O Isol chinga nangni nokolna nangko mitela. Da'o chinga uni pilak kamrango patianirangko gisik ra'enga. O Isol chinga nangni nokol Dwight David Eisenhower jean chingni ripeng, gisikni aro bebe ra'anio gipinrangna didiani ongahani gimin aro pilak namgipa gunrangna

nangko mitela. O Isol chingaba maikai nangni
namnikao chingni janggi tanganiko asongna,
jatna aro manderangna ganchate jakkalna man-
gen patibo. Jisuni bimungo bi'aha Amen."

Poraiani Bak 10.

Abilene Kansaona Ra'angani :

Ua apsan salni atamo Washingtono bonkame
salam ka'anina ton 1 12 jringipa kontakto doka-
ha, maina ua maile 1379 chelgipa antangni
songtangona reangnasiengachim. Army Band
bonkame uko salam ka'na gita uni namnikgipa
git, "Army Blue" ko sika moachi ringaha.

Ia biapo anehing dongchana nangjawa,
Maina jasa ba jangnini gigepon,
Kaydet Grayko salam ka'e re'gen,
Aro Sipaini pring nabagen."

Iana agreba, ka'sa senga Andalbamitingo ang-
ko dilbo; Isol ching pangchakbaani aro dak-
grikao ringgpa gitrangko ring'aha. 1969 bilsini
April 2 tariko dingtangmancha trainko tik ka'e
Eisenhowerni manggisiko traino donataha. Si-
pairang pong 21 slaiko goaha. Aro Americani
State ge 50 gimikon sipairang pong 50 silaiko
mande ra'na goaha., maina ua asongko naljo-
kataha ine gisik ra'aniba ong'aha.

Jeje biaprangko tain repakangaha pilak
biapon manderang aro sipairang ramao dong-
soe salam ka'rikaha. Abilenona sokeahaon
bangbea manderang uko grongsoaha, bangani
mikrono mikchian gape aganan manpiljaha.
Uko Abileneni gilja nokona ra'ange kadikgipa
giljako ka'enba asongtangni goprano gopaha.
Major General Luther sipaini chaplain bonka-
me agane Isolo bi'e gopaha.

“Uni dakgrikna nangako name dakgrikaha,
uni amna nangako amtokaha chinga chingni
Kristoo ripengko ,O Isol nangni jakona pak-
wata, Amen.”

Iandipet Dwight Divid Eisenhower tom-
tome biaptango nengtakaha.

Eisenhowerko mingsingani:—

Eisenhowerko mingsingani Uni sipaini kamo
chusokgipa aro Europeo dakgrikanio cheaninasan
ongaijaha, indiba uni nama Janggi tanganina,
toromi onganinaba ongaha ine nikgen. Chonmi-
tingo uni ma'gipa toromna gisik nangataha aro
kamna bimchipataha la minggnian ma'gipaoniko
manrikgimin gamrangoni una mongsongbatgipa
ong'e uni Janggi tanga gimiko uko dakchakaha.

Beben uni dakgrikao cheani, sason ka'anio
gital dakanirangko gisik ra'na kra'a, indiba uni
oholon bewalo namjaode aro toromo Janggi
tangjaode uerang mamungba ongjawachim. Pilak-

na skang ua Isolni toromko amchengaha uni
gimin pilak ag'lsako chusokna nanganiko aro
mingsing minggamaniko una ondapaha.

Bobilko amna Isol dakchakaha, Sason ka'a-
nio una uianiko onaha Janggi tangao uko ming-
singaha. "Ka'san senga andalbemitingo angko
dilbo" ine Eisenhoweri namnikbatgiparangoni
mingsa git ong'a. Ia gitan Isol uko tomtome
nengtakatna rimangaha. Guli aro goachi sijaha
indiba tomtome rimangako man'aha.

Rev. Karbenson Sangma.